

**Uunga siunnersuut: Tapersiissutitalimmik inissialiortiternermut  
taarsigassarsititsisarneq pillugu Inatsisartut inatsisaat nr. xx, xx. xxx 2019-imeersoq**

(Ineqarnermut Attaveqarnermullu Naalakkersuisoq)

**pillugu**

**Sanaartornermut Ataatsimiititaliap**

**siunnersuutip pingajussaaneernejarneranut**

**ILASSUTITUT ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq  
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia  
Inatsisartunut ilaasortaq Nikkulaat Jeremiassen, Siumut  
Inatsisartunut ilaasortaq Justus Hansen, Demokraatit  
Inatsisartunut ilaasortaq Pele Broberg, Partii Naleraq

UKA 2019-imi ulloq 19. november 2019 aappassaaneerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Ataatsimiititaliap aappassaaneerinninnissamut isumaliutissiissutaanut iluarsissut 15. november 2019-imi ullulerneqartoq innersuussutigineqarpoq.

**Siunnersuutip Inatsisartunit siullermeernejarnera**

Ataatsimiititaliap aappassaaneerinninnissamut isumaliutissiissutaanut iluarsissut 15. november 2019-imi ullulerneqartoq innersuussutigineqarpoq.

**Tusarniaanermut akissutit**

Ataatsimiititaliap aappassaaneerinninnissamut isumaliutissiissutaanut iluarsissut 15. november 2019-imi ullulerneqartoq innersuussutigineqarpoq.

**Ataatsimiititaliap siunnersuummik suliarinninnera**

Ulloq 19. november 2019-imi aappassaaneerinninnermi UKA 2019/141 ataatsimiititaliamit

suliarineqartussanngorlugu innersuuteqqinneqarpoq. Tunisinermut atatillugu inissiamik pitsanngorsaannermut akiliutit ”nerriviup ataatigut” akilerneqartalernissaat aarleqqutigineqarsinnaasoq INI A/S-ip oqaaseqaatimini eqqumaffigeqqugaa ataatsimiititaliap isumaliutissiissummini siullermi 15. november 2019-imik ullulerneqartumi innersuussutigaa. Tamanna pissutigalugu taamatut aarleqquteqarsinnaaneq inatsisissatut siunnersuutip aappassaaneerneqarneranut nassuiaatigeqqullugu Naalakkersuisut ataatsimiititaliamit kaammattorneqarput. Aappassaaneerinninnerup kingorna Naalakkersuisut tamatumunnga tapertatut oqaaseqaatiminnik Naalakkersuisut tunniussipput ilaatigullu ima allallutik:

“INI A/S-imiit siunnersuummi § 9, imm. 3 nutaajusoq maluginiarneqarpoq, erseqqissaatigaalu ullumikkut akiitsullit nikinnerat akuerineqarluni inummut allamut tunisinermi, tunisisoq inissiami pitsanngorsaannerminut atatillugu aningaasartuutimi amerlaqataannik aningaasanngorlugit tigusinissaq pisinnaatitaaffigigaa. INI A/S isumaqarpoq, siunissami tunisinermut atatillugu inissiamik pitsanngorsaannermut akiliutit ”nerriviup ataatigut” akilerneqartalernissaat ilimagineqarsinnaasoq. Tamatuma saniatigut INI A/S-imiit erseqqissaatigineqarpoq, taarsigassarsianik aqutsissutit pioreersut atorlugit piginnittut nikinneranni akiliutissat isumagineqarsinnaassanngitsut, aammalu atortut allanngortinnissaannut aningaasanik immikkoortitsisoqartariaqartoq.

*Inissiamik tunisinissaq ataatsimut naliiffigineqartartussaavoq, taamaattumillu inissiamik pitsanngorsaannermut immikkut ittumik akiliisitsisarnissaq pisariaqassanngitsoq naliliisoqarpoq.”*

Tamatumunnga erseqqissaatigineqassaaq, siunnersuummi § 9, imm. 3-mi allassimammat: “Piginnittut nikinnerannut atatillugu piginnittut nikinneranni akilersuutit akilersorneqartarnerinut, kiisalu piffissamut akilersuiffiusussamut allannguisoqarnissaanut piunasaqaatinik Naalakkersuisut aalajangersaasinnaapput.”

Siunnersuummi § 9, imm. 3-mut nassuiaatini allassimavoq:

“Imm. 3-mut

Tapersiissutitalimmik illuliamik ingerlasunik taarsigassarsiaqarfiusumik tunniussinermi piginnittut nikinneranni akiliuteqartitsinissamut piunasaqaatinik Naalakkersuisut aalajangersaasinnaapput. Aalajangersagaq pingaartumik piginnittut nikinnerannut, pisinissamut akimik isumaqatigiissuteqarfiusumut, taassumalu uppersarsarnerani tunisisumut aningaasanngorlugit akiliinermik kinguneqartumut atorneqartariaqarpoq.

Akiitsullit nikinneranni tunniussinermi tunisisumut aningaasanngorlugu akiliuteqartoqarsimatillugu, tamatumalu peqatigisaanik taarsigassarsiat akilerneqarsimatinnagit appartinneqarsimatinnagillunniit Naalakkersuisut pingaarnertut itigartitsisariaqarput.”

Naalakkersuisut ilisimatitsissutigaa qinnuteqaatit, “nerriviup ataatigut” tunniunneqarsinnaasut ilimagineqarsinnaasut Naalakkersuisunit qanoq isumagineqartassanersut isummerfigineqareersimasoq.” Tamanna pillugu takuuk **ilanngussaq 1.**

Naalakkersuisut siuliani tapertatut oqaaseqaataat tunngavigalugit “nerriviup ataatigut” tunniussisoqaratarsinnaanerani ajornartorsiut pillugu Naalakkersuisut isummernerat ataatsimiititaliamit naammagisimaarneqarpoq.

### **Siunnersuutip aningaasaqarnikkut kingunerisassai**

Ataatsimiititaliap aappassaaneerinninnissamat isumaliutissiissutaanut iluarsissut 15. november 2019-imik ullulerneqartoq innersuussutigineqarpoq.

### **Ataatsimiititaliap inassuteqaatai**

Inatsissatut siunnersuut akuersissutigineqassasoq ataatsimiititaliamit isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.

---

Anders Olsen  
Siulittaasq

---

Aqqaluaq B. Egede  
Siulittaasup tullia

---

Nikkulaat Jeremiassen

---

Justus Hansen

---

Pele Broberg